

2014-imut Aningaasanut Inatsisissatut Siunnersuut

(Aningaasaqarnermut Nunamullu Namminermt Naalakkersuisoq)

Akissuteqaat

(Aningaasaqarnermut Nunamullu Namminermt Naalakkersuisoq)

Pingajussaaneerneqarnera

Aningaasanut inatsit nunamut tamarmut attuumassuteqartoq Tassa oqaluuserisassani immikkoortoq taanna naammassillugu suliarereerutsigu ullumi aalajangiiffigisassarput taannaavoq. Aningaasanut Inatsit sulinermit akileraarut qaffatsinngikkaluarlugu ukiut sisamat sinnerlugit atuussinnaavoq.

Aningaasanut Inatsisissatut Siunnersuutip aappassaaneerneqarnerani partiinit tamanit isumaqatigineqarpoq inuusuttatta siunissaannik isumaginninnissatta pingaaruteqarnera. Eqqarsaatit takkua Naalakkersuisunit taperserpavut. Aningaasanut Inatsisissaq maanna aalajangiiffigisassarput siunissami sulinissatsinnut tunngavileeqataasussavaoq. Isumaqatigiinniarnerit ilungersunarput, Naalakkersuisullu piffissaq tamakkerlugu amerlanerit peqataatinneqarnissaat anguniarlugu sulipput. Tamannali ilungersorluni sulisoqaraluartoq anguneqassasorineqanngilaq. Naalakkersuisut ataatsimiititaliap innersuussutai taperserpaat.

Kikkut tamarmik ulapittupilussuullutik sulipput. Naalakkersuisut tulliani aningaasanut inatsisissamik suliaqalinnginnerminni kikkunnut tamanut naammaginartumik ingerlatsinissaq inuiaqatigiinnullu iluaqutaasumik angusaqarnissaq siunertaralugu suliartik Inatsisartunillu suleqateqarnertik nalilersorniarpaat.

Ukiunimi aggersuni tamatta nammaqatigiinnissarput pisariaqartinneqalissaaq. Taamaammat pingaaruteqarpoq, Aningaasanut Inatsit makkuninnga tunngaveqarluni siunnerfilik isumaqatigiissutigissagipput:

- sanaartornerup sinerissamut siammarterneqarnera assigalugu suliassat kommuninut sisamaasunut tamanut siammarterneqarnissaat
- inuussuttavut isumagissavagut, soorlu atornerluinermik eqqugaasimasunut aningaasaliissuteqarnerusugut
- akileraartarnermut tunngaviusup siammarterneqarnissaanik naatsorsuuteqarnitsigut suliassarfiit tamarmik iluarsartuunneqarnissaat pisariaqarpoq.

Aqutissatta sisamassaata tassaavoq aatsitassanik isumalluuteqarnek. Tamanna maanngaannit isertitatut aningaasanut inatsisissatut siunnersuummi missingersuusionneqanngilaq. Tamannalumi pinaviannigilaq isertitaajumaartussat atuutsilertinnagit. Taamaammat suliassarfik taanna inerisarniarlugu sulinerput ingerlatiinnassavarput.

Taamaammat sulinerput maanna unitsissanngilarput. Ukiuni aggersuni ilaatigut aalisarnermik isumalluutinillu akitsuusiinissat aamma isumaginninnermut, pensionisiaqarnermut ineqarnermullu tunngatillugit suliassarfiit iluarsartuuteqqinneqarnissaat pillugit Naalakkersuisut Inatsisartunik oqaloqateqarniarput. Suliassaq iluarsartuusseqqinnerit allat peqatigalugit sapiisuseqarfiusariaqartoq ilungersunartunillu aalajangiiffigisassaasoq pingaaruteqarpoq. Taamatut iliornikkut aningaasanut inatsit oqimaqatigiissittuassavarput nunamilu tamarmi atugarissaarnerput attatiinnarlugu.

Aningaasaqarnermut Akileraartarnermullu Ataatsimiititaliap allannguutissatut siunnersuummik itigartitsinerannut aamma ataatsimiititaliap nammineq allannguutissatut siunnersuutaanut Naalakkersuisut imatut oqaaseqaatissaqarput:

Naalakkersuisut ataatsimiititaliap inassuteqaatai tunngaviatigut ataqqivaat. Avaleraasartuut kiilumut 1,5 kr.-inik akitsuuserneqartalernissaat pillugu ataatsimiititaliami amerlanerussuteqartunit allannguutissatut siunnersuummut tunngatillugu avaleraasartuunik aalisarnerup inuiaqatigiinnut naammaginaratumik iluanaarutaanissaannik siunertaqarneq Naalakkersuisut tapersersorpaat. Naalakkersuisulli isumaqarput, aalisakkat taakku amerlassusaat aamma taakkuninnga aalisarnerup imminut akilersinnaanera pillugu, aammalu oqaasertaliussat taamaallaat aallaavigalugit akitsuusiinissaq, maannakkorpiaq arlalinnik qularnartoqartoq.

Aalisarnermik inuussutissarsiutillit oqaloqatiginerisigut aamma imminut akilersinnaanerata misissoqqissaarneqarneratigut qularunnaarsitsisussamik inatsisissamik piareersaalluni suliaqartariaqarneq aallaavigalugu 2014-imi upernaakkut katersuunnermi akitsuutit pillugit Naalakkersuisut inatsisissatut siunnersuummik saqqummiussilersaarput. Taamaamat suliasaq taanna pingaartinneqassaaq nukingiunneqarlunilu. Naalakkersuisut anguniarpaat inatsisissatut siunnersuutissaq taanna 2014-imi aasakkut avaleraasartuunik aalisarnerup aallartinnginnerani piffissaalluartillugu akuersissutigineqarsinnaanera.

Inatsisissatut siunnersuut Inatsisartuni akuersissutigineqartoq aningaasaqarnermut kinguneqassappat, Naalakkersuisut tamatuma malitsigisaanik ilassutitut aningaasaliissuteqartoqarnissaanik qinnuteqaammik Inatsisartut aalajangiinerat naapertorlugu akitsuutip iluanaarutaanissaanik missingiinnermut naapertuuttumik saqqummiussissapput. Akitsuutip Kalaallit Nunaanni avaleraasartuunik aalisarnerup imminut akilersinnaaneramik aamma inuiaqatigiinnut naleqquttumik pissarsissutaasinnaaneramik qulakkeerinninnissaa pingaaruteqarpoq.

Naalakkersuisut taamatut oqaaseqarlutik Aningaasaqarnermut Akileraartarnermullu ataatsimiititaliami amerlanerussuteqartut inassuteqaataat taperserpaat, 2014-imullu aningaasanut inatsisissatut siunnersuut Inatsisartuni suliassanngortillugu.